

Powšitkowne WOZJEWJENJA

njedźelu, 17. nowembra 2024

TCM prosy na škot a rommé

Sekcija Swójba Towarstwa Cyrila a Metoda z.t. (TCM) přeprašuje wšitkich zajimcow na škotowy turněr, kotryž wuhotuje wona wutoru, 19. nowembra, na předwječoru pokutneho dnja, we 18.30 hodź. w Jasčanskej „Bjesadze“. Kulturny dom nańdžeš z Dobrošic přijěducy a křižowanišćo přeprěčiwiši runjewon na kromje wsy. Wuraznje su nimo muži tež žony přeprašene, wšojedne kotreje staroby. Za tych, kotřiž njemóža škot hrać, zarjaduja zdobom turněr z kartowej hru rommé. Myta ma TCM za dobyčerjow wobeju turněrow sprihotowane. Wobdźělenje je za wšitkich darmotne. Wo zastaranje z jědžu a napojemi so TCM postara.

Ekumeniski nyšpor před něhdyšim bunkerom

W Tuchorskim lěsu wotměje so pokutny dzeń, srjedu, 20. nowembra, w 10.00 hodź. dwurěčny ekumeniski nyšpor před jednym z něhdyšich bunkerow. Wšitcy zajimcy su wutrobnje přeprašeni. Ze srjedź Hornjeho Wujězda wotbočiš do směra Wulkeho Wosyka (Großhänchen). Něhdže 500 metrow za Wujězdom podaš so na pólny puć naprawo do Tuchorskeho lěsa. Čara wjedže nimo tamnišeje hěty, a něhdže 200 metrow za njej maš wótrje naprawo wotbočić. Wottam je parkowanišćo widžeć. Tón dzeń je dowolene, so tam z awtom podać. Pod www.posol.de je čara na karće wozjewjena.

Modlenje w Róžeńće

Na modlenje před Najswjećišim su wěriwi sobotu, 23. nowembra, we 18.00 hodź. do Róžeńčanskeje hnadowneje cyrkwy přeprašeni. Pačerje budu w serbskej a němskej rěči spěwane.

Zetkanje samostejacych

Samostejacy ze serbskich wosadow su na swoje lětuše poslednje zetkanje wutoru, 10. decembra, w 14.00 hodź. do Smochčanskeho kubłanišća swjateho Bena přeprašeni. Zajimcy njech so hač do wutory, 3. decembra, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy kaž tež ći, kotřiž njejsu samostejacy, su tohorunja wutrobnje witani. Kóždy njech sej Wosadnik sobu přinjese. Štóz chce wo te wzaty być, njech to prošu zdžěli.

Hodowna pakćikowa akcija

Towarstwo swjateje Filomeny z.t. chce tež lětsa zaso džěći a swójby w maćerno-džěćacym domje w čěskim Dolním Podluží kaž tež w bołharskim Razgradze a wokolnych wsach z hodownymi pakćikami zwjeselić. Wobsah pakćikow njeje předpisany. Trjebanu drastu a črije lětsa njechromadža. Pakćiki kaž tež počehnjenja a twory hygieny zběraja wot pónđzele do štwórtka, 2. do 5. decembra, wšědnje wot 17.00 do 18.00 hodź. w kulturnym domje w Smjerdžacej. Z pjenježnymi darami maja so přenjorjadnje transportne kóšty narunać. Kwitowanku za pjenježne dary po přěcu wustaja. Dalše informacije podawa Gerat Róbl w Smjerdžacej pod telefonowym čislom (01 72) 7 94 75 22.

Młodostni na Chrysta Krala do Chróścic

Na zhromadny nyšpor je dekanatna młodžina tež lětsa na swjedženju Chrysta Krala, njedzelu, 24. nowembra, do Chróścic prošena. Započatk je w 14.00 hodž. Młodostni njech sej swoje šmóratko sobu přinjesu.

Paslenje adwentneje pychi

Mačerje a nanojo z džěćimi, ale runje tak samostejacy su na paslenje adwentneje pychi do Róžanta na administraturu pódlu cyrkwy přeprošeni. Paslenje přewjedu sobotu, 23. nowembra, wot 14.00 do 18.00 hodž. Hladajo na to, kelko materiala měło so wobstarać, prosy Gerat Róbl ze Smjerdžaceje, zo bychu so zajimcy telefonisce pod čisłom (01 72) 7 94 75 22 přizjewili. Štóž chce, je we 18.00 hodž. k modlenju před Najswjećišim w Róžeńčanskej swjatnicy přeprošeny.

Přednoški k zažnym stawiznam Słowjanow

K temje „Stare genomy zwjazuja wulku migracisku žołmu z rozšěrjenjom Słowjanow“ porěča wjacori sobudžěłačerjo Lipščanskeho Maxa Planckoweho instituta wutoru, 26. nowembra, w 19.00 hodž. w Budyskim Serbskim domje. Woni budu w němskej rěči přednošować. Maćica Serbska přeprošuje k tomu wšěch, kotřiž so za zažne stawizny Słowjanow zajimuju, wosebje za dobu připućowanja Słowjanow do Europy, a kotřiž chcedža wjac wo metodach młodeje wědomostneje discipliny archeogenitiki zhonić. Mjez referentami budže direktor a wotrjadnik profesor dr. Johannes Krause, awtor knihi „Die Reise unserer Gene“. Jeho maja za jednoho z najwuznamnišich slědžerjow na polu archeogenitiki po wšěm swěće.

Kulturna zyma w Chróścicach

Mjeztym 13. kulturnu zymu zarjadowuje Monika Gerdesowa wot 30. nowembra do 15. februara stajnje sobotu w swojej putniskej hospodže w Chróścicach. Nimale tydzensce poskićuje wona wšelake zarjadowanja za džěći a dorosćenych w serbskej a němskej rěči. Přehlad zarjadowanjow je w interneće pod www.posol.de wozjewjeny.

Mandželskej seminaraj

Seminaraj k přihotej na sakrament mandželstwa wotmějetej so klětu stajnje pjatk a sobotu, 7. a 8. februara kaž tež 28. a 29. nowembra, w Smochčanskim kubłanišću swjateho Bena. Přizjewjenja přijimuje dekanatne dušepastyrstwo młodžiny we Worklecach hač do srjedy, 8. januara, online. Link je pod www.posol.de podaty.

Serbski comic wo influenceru Božim

Wo młodostnym z Italskeje, kiž móžeše jara derje z kompjuterami wobchadžeć a ko-tryž ma so bórze swjatoprajic, předleži wotnětka kniha w serbskej rěči – a to jako comic. Carlo Acutis (1991–2006) běše na leukemiju schorjeł a je jenož 15lětny zemrěł. Publikacija je na wšitkich farach w katolskich Serbach za 15,00 eurow na předań. Po českej wersiji je ju farar Gerat Wornar přeložil a Fabian Kaulfürst lektorizował.